


ՀԱՅԱՍՏԱՆԻ ՄԻՋՆԱԴԱՐՅԱՆ ԿԵՆՏՐԱԼԱՅԻՆ ՔԱՆԴԱԿՆԵՐԸ
(XV—XVI դդ.)

Գ. Զ. ԿԱՐԱԽԱՆՅԱՆ

Քարի վրա քանդակներ փորագրելը եղել է հայ ժողովրդական ստեղծագործության առավել սիրված և տարածված բնագավառներից մեկը: Միջին դարերից մեղ հասել են ճարտարապետական հուշարձանների, խաչքարերի և տապանաքարերի վրա կատարված բազմաթիվ քանդակներ, որոնց մեջ մեծ թիվ են կազմում բարձրարվեստ երկրաչափական և բուսական քանդակները: Հարուստ է նաև մարդկանց, կենդանիների, թռչունների պատկերաքանդակների մեղ հասած ժառանգությունը: Այս քանդակներն ըստ բովանդակության կարելի է բաժանել երեք հիմնական ենթախմբի՝ կրոնական, առասպելական, բովանդակությամբ և աշխարհիկ (կենցաղային) քանդակներ: Աշխարհիկ, կենցաղային բովանդակությամբ քանդակները մեզանում մինչ այժմ բավարար չափով չեն ուսումնասիրվել: Մեր մատենագիրների երկերում շատ չեն ժողովրդի զբաղմունքի, կենցաղի վերաբերյալ վկայություններ: Նրանք առավելապես անդրադարձել են իշխող խավերի կենցաղի առանձին կողմերին: Այդ բացը նշանակալից չափով լրացնում են միջնադարյան Հայաստանի կենցաղային քանդակները, ինչպես նաև զրչագրերում ծաղկողների թողած աշխարհիկ մանրանկարները: XV—XVI դդ. այդ քանդակները, բացի իրենց ունեցած գեղարվեստական արժանիքից, կարևոր են նաև իբրև հայ ժողովրդի ամենատարբեր խավերի կյանքի ճշմարտացի արտահայտություններ:

Միջնադարյան հնավայրերից հայտնի, աշխարհիկ բնույթի, ձևի և նյութի մշակման ինքնատիպությամբ հետաքրքիր այդ քանդակներում հանդիպում են երկրագործական, որսորդական, արհեստավորական, հարսանեկան, կերու խումի, ժողովրդական մարզական խաղերի ու հսկողականների տեսարաններ: XV—XVI դդ. պատկերաքանդակներում իր արտացոլումն է գտել երկրագործական կյանքի առօրյան: Հայկական բարձրավանդակում կատարված հնագիտական ուսումնասիրությունները ցույց են տալիս, որ Հայաստանը երկրագործական մշակույթի հնագույն օջախներից է: Նյութական մշակույթի, ընդ որում, նախնադարյան ժամանակների արվեստի հուշարձանները նյութեր են ընձեռում ոչ միայն բրնձային, այլև արորային երկրագործության մասին: Հնագույն երկրագործական գործիքներից մեկով՝ արորով վար անելու տեսարան վերջերս հայտնի դարձավ մ. թ. ա. III հազարամյակի ժայռապատկերներից: Միսիանի շրջանի Ուղտասար հնավայրում, ուր պահպանվել են վիթխարի քանակությամբ ժայռապատկերներ, քարերից մեկի ողորկ մակերեսին որոշակիորեն վերարտադրված է արորով վարելու տեսարան: Պատկերաքանդակի ձախ կողմում փորագրված է պրոֆիլ դիրքով դեպի աջ ուղղված մի ֆիգուր, որը արորի մաճին հենված քայլում է դեպի աջ: Նրա առջևում արորին լծված են եզներ: Վերջիններս պատկերված են սխեմատիկ. գտնվում են հակադիր՝ մեկը մարմնով վերև, մյուսը՝ ներքև դիրքերում: Հատկապես շեշտ-

ված են հզների աղեղնաձև նղշյուրները: Արորը ներկայացված է կառուցվածքային մանրամասներով (առատամ, մաճ, համձող, քարշածող, լուծ): Ժայռաբեկորի մնացած պատկերազարդ մասը որսի տեսարան է (նկ. 1):



Նկ. 1. Ժայռապատկեր, Ուզտասար, Սիսիանի շրջան

Հայաստանի գյուղատնտեսական տեխնիկան բնութագրելու, վարելու և երկրագործական գործիքների մասին նյութական վկայություններ են տալիս հնագիտական պեղումները: Նշանակալից թվով երկրագործական գործիքներ են հայտնաբերվել վաղնշական ժամանակների, բրոնզի էպոխայի, ուրարտական և հետուրարտական հնավայրերից, սակայն առավել նշանակալից են միջնադարյան հնագիտական նյութերը¹:

¹ Հայ մատենագրական աղբյուրներում պահպանվել են վարելու, բերքահավաքի և կալսելու բազմատեսակ գործիքների անուններ, ինչպես նաև հետաքրքրական տեղեկություններ միջնադարյան Հայաստանի երկրագործական սխտեմի մասին: Ինչպես հայտնի է, անտառային և տափաստանային գոտիներում, հինավուրց ժամանակներից երկրագործության համակարգում իր որոշակի տեղն է ունեցել անտառահատական սխտեմը: Հայաստանը թեև հարուստ չէ անտառներով, սակայն հողագործության անտառահատական սխտեմը միշտ դարձրել է ախտեղ և կիրառվել է: Այդ մասին եզակի վկայություններ են պահպանվել մատենագիրների երկերում: Արտակարգ կարևոր մի վկայություն մեզ է հասցրել Գր. Տաթևացին. «Սովորութի է երկրագործաց որք զմայրի և զխոպանացեալ երկիրն որ անպտուղ է, յորժամ կամին ի պտղաբերութի ածել նախ հրով այրեն զմայրիս և զհողն. և ապա հերկեն և սերմանեն. և պտուղ յոյժ բերէ» («Գրիգորի Տաթևացու Գիրք քարոզութեան որ կոչի Ձմերան հատոր», Պոլիս, 1899թ., էջ 721):

Հայաստանում երկրագործության մեջ IX—X դդ. առկա է հողաշաղթը (С. Т. Еремян, Армения в IX, первой четверти XIII в. («Очерки истории СССР», ч. I, М., 1953, стр. 590). Միջնադարյան աղբյուրներից մեզ հայտնի են բազմազան մշակովի բույսեր, հացահատիկային

Հայաստանում քարի վրա փորագրված գութանով վարի տեսարաններ առայժմ հայտնի են XV դ.: նման տեսարաններով են զարդարված Կամոյի, Ապարանի, Հրազդանի, Մարտունու, Կարմիրի, Սիսիանի, Գորիսի և այլ շրջանների գերեզմանների կոթողները (նկ. 2):



Նկ. 2. XVI դ. տապանաքար, Մարտիրոս, Եղեգնաձորի շրջան

Գութանավարի տեսարանով տապանաքար է պահպանվել Սիսիանի շրջանի Անգեղակոթ գյուղում: Գյուղամիջի միջնադարյան գերեզմանատանը գտնվող օրորոցաձև տապանաքարի հարավային կողմին, քանդակազարդ մակերեսի ամբողջ երկայնքով պատկերված է վարի տեսարան: Ձախ կողմում

կուտուրաներ, դրանց թվում նաև աշնանացան ցորենը: Ահա միջնադարյան Հայաստանի ագրոտիկայի մակարդակը հավաստող այդ հետաքրքրական տեղեկությունները. «Եւ ոպ իմաստուն տանուտերն նախահոգակ լինի՝ զայլ տարեանն ի յայտ տարիս հոգայ և սերմանէ և զեգցենն այսօր՝ և ձմռանն յամառն: Այնուհետեւ ... որ պատուական սերմ է ի յայտ տարիս սերմանեն, և միւս տարին հնձեն, ոպ ցորենան. և որ անարգ սերմն է, ի նոյն տարին սերմանեն, և ի նոյն հնձեն. ոպ կորեկ, գարի և այլն: ... յայլ այլ ժամանակս սերմանեն, ոպ յաշունն՝ ի գարուն. և ի մին ժամանակ հնձեն յամառն. և ի բազում տեղիս սերմանեն, և ի մին տեղիս ժողովեն ի կալն» և վերջապես. «Եւ թնրորդ՝ զի պատուական սերմն ցորենան է. ի մին տարին սերմանեն, և միւս տարին հնձեն. բայց որ չէ պատուական՝ ի նմին ամի սերմանեն, և ի նոյն ամի հնձեն.

ոպ գարի և կորեկ: ... Ութներորդ՝ զի ցորենան յորժամ ի ներքոյ ձեանն մնայ, զարմատն ի հողն հաստատէ. և ի գարունն ջարժի և բազում արդիւնս առնէ. ապա թէ պարզ լինի՝ շոր ցուրտն տանի և անպտուղ առնէ» (Գրիգորի Տաթևացոյ Գիրք քարոզութեան որ կոչի Ամարան հատոր, Կ. Պոլիս, ԲՃՂ, էջ 379, 129—130, 379): Այսպես կարելի է վկայակոչել միջնադարյան Հայաստանի գյուղատնտեսության մակարդակը բնութագրող և այլ հետաքրքիր վկայություններ, սակայն դա մեզ շատ հեռու կտաներ: Դառնալով երկրագործական գործիքներին, հարկ է նշել, որ մատենագիրների երկերում վարող գործիքներից բազմիցս վկայակոչված է արորը: Հաճախ մատենագրության մեջ և վիմագիր հիշատակարաններում արորը և գութանը հայտնի են միևնույն անունով՝ վեցկի, այսինքն երեք լծով՝ վեց եզներով գործի գրվող երկրագործական փորձիք: Հետաքրքրական է Սաղմոսավանքի գրատան XIII դ. նվիրատվական արձանագրությունը, որտեղ անվանված են Սասնա Վաչե և Գրիգոր եղբայրների կողմից իրենց ժառանգական հայրենիք հանդիսացող գյուղից վանքին տրված հանդերը, ինչպես նաև հիշատակված են մեկ գութանի հող (իրրև մեկ օրում վարելիք հողի շափի միավոր), ջրովի վարելահող, հավա-

տեղադրված է մարմինը երեք քառորդ թեքությամբ մաճկալը: Քանդակագործը աշխատել է հետևել հեռանկարի որոշ սկզբունքներին: Գուլթանի անիվները հավասարաչափ չեն. ակոսի միջով ընթացողը պատկերված է մեծ, մյուսը՝ փոքր: Քարի կոփածո մակերեսի մեծ մասը տրամադրված է լծկանին՝ գուլթանը քաշող եզներին: Վերջիններս պատկերված են երկու շարքով, երեք զույգով: Տապանաքարի նկարագրող մակերեսի երեք կողմերը (բացի ստորինից) շրջանակավորված են երկշար, կեռամանաձև զարդագոտիով:

Կատարման բարձր արվեստով է աչքի ընկնում Սիսիանի շրջանի Տոլորս դյուզի գերեզմանատան կոթողը (XVI դ.)²: Օրորոցաձև տապանաքարի հյուսիսային կողմի կոփածո մակերեսն ամբողջ երկարությամբ ծածկված է քանդակներով: Ձախ հատվածում հեծյալ է, աջ կողմում՝ գուլթանավարի տեսարան: Վերջինս հորինվածքային առումով բաղկացած է երկու մասից. պատկերված են մաճկալը և գուլթանին լծված երկու զույգ եզներ: Ամենայն մանրամասնությամբ վերարտադրված գուլթանի հսկում, երկու ձեռքերով մաճը բռնած, փոքր ինչ կռացած, ձախով գուլթանի ոտքը սեղմելու դիրքով կանգնած է մաճկալը: Նա իր կեցվածքով ընդգծում է ուժային այն աշխատանքը, որը բնորոշ է հողագործին: Մաճկալի և լծկանի միջև բավական խոշոր պատկերված են գուլթանի մեծ և փոքր անիվները: Եզները ներկայացված են երկու շարքով՝ մեկը մյուսի հետևից՝ լծով իրար միացած: Քանդակազարդ մակերեսի երկու կողմերը զարդարված են երկշար սեպերով, իսկ վերին հորիզոնականը՝ հյուսվածքի գեղեցիկ զարդաքանդակով: Օրորոցաձև այս տապանաքարի վերին մասում փորագրված արձանագրությունից իմացվում է, որ այն կանգնեցվել է 1580 թ. ԵՍ ԳՈՒԱՄԻՐՍ, ՈՎԱՆԷՍ ՔԱՀԱՆԱՍ, ՈՐԴԻ ՄԱԿԱՍԱՐԻ ԿԱԿՆԵՑԻ ՏԱՊԱՆՍ ԵՂԱՒԱՐ ԻՄ ՎԱ(Ր)ԴԱՆԷՍ ԹՎԿ ՌԻԹ (1580)³:

Երկրագործական տեսարան է պատկերված Մարտունու շրջանի Ադամխան գյուղի տապանաքարերից մեկի հարավային կողմին: Տեսարանի ձախ կողմում քանդակված է մարդկային պատկեր, որը աջ ձեռքին բռնել է թաս, ձախով՝ զինու սափոր: Փոքր-ինչ վերև վերարտադրված է ևս մի փոքր սափոր: Երկրորդ ֆիգուրը սազ նվագող երաժիշտ է, կողքին ուտեստով լի պնակ, իսկ վերևում նետ ու աղեղ. այնուհետև՝ երկշարք դասավորությամբ ձիու պատկեր և չորս լծներով գուլթան: Ձիու ամբողջ երկայնքով ձգված է օձ վիշապ, որը դուրս է գալիս բուսական զարդաձևից և գալարուն շարժումներով ձգվում դեպի ձիու պարանոցը: Կենցաղային իրերից վերարտադրված են սափորներ:

Նարար չրովի մարդ կամ այդի: ՇԵՈՐՀԱԹ ԱՄԵՆԱԿԱԼԻՆ ԱՅ ԵՍ ՍԱՍԵՒՍ ԵՒ ԵՂԱՐՔ ԻՄ ՎԱԶԷ ԵՒ ԳՐԻԳՈՐ ՄԻԱՐԱՆԵՑԱՔ ՍԹ ՌԻՆՏԻՍ ՍԱՂՄՈՍԱՎԱՆԻՑ ԵՒ ՏՈՒԱՔ Ի ՄԵՐ ՀԱՐԵՆԵ ԳԵՂԷՍ ԱՂԱՐԱԿԵՂՈ ՀԱՆԴԷՆ ԶՓՆՏԿԻՏԱՓՆ ՈՐԶԱՓ ԶՈՒՐՆ ԵԴՈՒՍ ԳԱ: Ա: ԳՈՒԹԱՆԻ ՀՈՂ ԺԱՂԱԳՈՎՆ ԶՐՈՎԻ ԵՒ ՍՈՔԱ ԽՈՍՏԱՑԱՆ Ի ՏԱՐԻՆ: Գ ՊԱՏԱՐԱԳ ՀԱՄԱՐԱԶՄԱՆ ԵԹԵ ՈՔ ՅԱԻԱԳԱՅ ՀԱԿԱՌԱԿ (արձանագրությունը կիսատ է թողնվել): Գուլթանի մասին է հիշատակում Առաքել Սյունեցին. «Իսկ զնդական արհեստք ամենայն զնդաձև մարմնով առնէ զգործ իւր և զնդական ասի, որպէս սայլն, որ հոլովի շարժմամբ և շահրի գունդն գուլթանին և չրաղացին՝ կունդն և քարն» (Մատենադարանի ձեռագիր № 7950, էջ 79ա): Գուլթանը վկայված է նաև ժամանակագրություններում. «... որ և անկաժ յամէն, զլուս ԴՈՒ (4000) դեկան և (յամէն) գուլթան ժՈՒ (10000) դեկան» (Վ. Հ ա կ ո ղ ա ն, Մանր ժամանակագրություններ, հ. I, Երևան, 1951, էջ 128):

2 Վ. Բ դ ո ղ ա ն, Երկրագործական մշակույթը Հայաստանում, Երևան, 1972, էջ 182:

3 Արձանագրությունը բերում ենք մեր դաշտային օրագրից:


Տապանաքարի արևելյան ճակատին փորագրված է գեղեցիկ եղնիկ, որն իր վայելչագեղ շարժումով և մարմնի համաչափություններով կոթողի լավագույն քանդակաղարգ հատվածն է կազմում: Կենդանու գլխավերևում գալարվելով վեր է բարձրանում վիշապ-օձը: Այս քանդակի թեմատիկ բնույթը վերարտադրում է միջնադարյան հայ գրականությունից մեզ հայտնի այն ավանդությունը, որի համաձայն եղնիկը հանդես է գալիս իբրև օձահալած կենդանի: Տապանաքիրը փորագրված է կոթողի հարավային կողմին, շրջանակից վերև՝ ԱՅՍ և ՀԱՆԳԻՍՏ ԳԱՍՏԱՐԻՆ ԹՎ ՌԼ (1581): Երկրագործական տեսարան է պատկերված նաև Հրազդանի շրջանի Բջնի գյուղի միջնադարյան գերեզմանատանը գտնվող տապանաքարի մակերեսին: Այստեղ վերարտադրված են մաճկալ և հորիզոնական դրված գութանի քարշաձողի շարունակությունը կազմող երկար մետաղե շղթա, որի երկու կողմերից լծված են հինգ զույգ եղներ:

Միջնադարյան Հայաստանի տնտեսության երկրորդ հիմնական ճյուղը անասնապահությունն էր: Խաշնարածությունն իր արտացոլումն է գտել XV—XVI դդ. կենցաղային պատկերաքանդակներում: Սեանա լճի ափամերձ բնակավայրերից, Սյունիքից և այլ տեղերից մեզ են հասել հովվական տեսարաններով հետաքրքիր կոթողներ: Եղեգնաձորի շրջանի Սալլի գյուղի միջնադարյան գերեզմանատան XV դ. տապանաքարերից մեկի քանդակազարդ մակերեսին պատկերված է ձեռքերը կրծքին խաչած հովիվ (ամբողջ հասակով): Այս քանդակում ամենահետաքրքրականը հովվական պարագաներն են՝ խաշնարածի գավազանը, սրինգը, մկրատը և մի իր, որը ակներևաբար հովվական մաղախ է: Ամբողջ աջակողմյան հատվածում ձգվում է ոչխարի հոտը, որին առաջնորդում է ներին:

Հովվական տեսարանով կոթող է պահպանվել Մարտունու շրջանի Աստղածոր գյուղի միջնադարյան գերեզմանատանը: Քանդակազարդող վարպետը քառանկյունաձև տապանաքարի արևելյան ճակատի վերևի մասը հարդարել է հինգ աստիճաններով: Հյուսիսային կողմի աջ հատվածում, քառանկյունի շրջանակի մեջ, պատկերված է ոչխար: Աջակողմյան հատվածի ստորին մասում, աջից ձախ, պատկերված է հոտ՝ իրար հետևից ընթացող հինգ ոչխարներով, որոնց դարձյալ առաջնորդում է ներին: Այս շարքից վերև վերարտադրված են հովվական սրինգ, փող, հովվական գավազան և դանակ: Տապանաքարի բարձիկից վերև արված է երկթեղ հյուսվածքազարդ հիշեցնող գեղեցիկ զարդաքանդակ: Կոթողի հարավային կողմին քանդակված են հինգ զարդաբույս խաչեր:

Քանդակագործության ժողովրդական ուղղության ներկայացուցիչների այս ժամանակահատվածի ստեղծագործություններում առանձնակի տեղ են գրավում որսի տեսարանները, որը բնական է ու հասկանալի (նկ. 3): Որսորդությունը միջին դարերում կորցնելով իր երբեմնի նշանակությունը դարձել էր բնակչության ամենատարբեր սոցիալական խավերի սիրած զբաղմունքը և ուներ մասամբ տնտեսական, մասամբ յուրօրինակ սպորտային, մարզական բնույթ: Միջնադարյան Հայաստանում սպորտային նշանակություն ունեցող որսի մասին են վկայում պատկերաքանդակներում բազեով որս կատարելու տեսարանները: Որսի հետաքրքրական տեսարան է պատկերված Սիսիանի

շրջանի Անգեղակոթ գյուղի օրորոցածե մի տապանաքարի վրա: Վերջինիս հարավային կողմին վերարտադրված է կոմպոզիցիոն երկու դրվագներից բաղկացած կենցաղային մի քանդակ: Դրվագները միմյանցից բաժանված են վահանաձև զարդաքանդակով, որը տեղադրված է քարի երկայնական մասի կենտրոնում և իր նմանատիպերն ունի պատկերազարդ քարի աջ և ձախ ծայրերում: Դրանով հորինվածքային երկու դրվագներն առնվում են վահանաձև:



Նկ. 3. XVI դ. տապանաքար, Անգեղակոթ, Սիսիանի ջրջան

զարդապատկերների մեջ: Ձախակողմյան հորինվածքը պատկերում է աջ ձեռքում՝ թռչուն (ականեղաքար բազե), իսկ ձախում գավաթ բռնած հեծյալի, որը գլխին ունի երկու կողմերից ականջակալների նման դեպի ծնոտը իջնող զրխարկ: Ձին պատկերված է շարժման մեջ, պոչը հանգուցված է: Հետին աջ ոտքը մի փոքր ավելի մեծ է, մնացած ոտքերը խիստ սխեմատիկ են և պայմանական: Ընդհանուր առմամբ համաչափությունները մասամբ պահպանված են: Ձիու գլխի վերին աջ կողմում միջին վահանաձև զարդապատկերի եզրին պատկերված է մի թռչուն: Ջարդապատկերի հակառակ կողմում, համաչափության պահպանման նկատառումով, պատկերված է մեկ այլ թռչուն:

Աջակողմյան հորինվածքը ներկայացնում է միայն կենդանիների պատկերներ: Այն բաղկացած է երկու՝ վերին և ստորին շարքերից: Բոլոր կենդանիները գտնվում են շարժման, վազքի մեջ: Պլաստիկայի ճշտության, ինչպես նաև համաչափությունների պահպանման տեսակետից առավել կատարյալը ստորին շարքի այծամն է: Քանդակի ստորին մասը եզրափակված է գոտիով, որի վրա պատկերված են հավերժության երկու նշաններ: Տապանաքարի վերին, երկթեք կողմի մակերեսը զբաղեցնում է տեղ-տեղ վնասված տապանադիրը. ԱՅՍ Է ՀԱՆԳԻՍՏ [ՇԱՊԱՆԻՆ ՈՐ] ԿԵՍԱԻՐԵԱ ՓՈԽԵՑԱԻ Ի ՔՍ. ԿԱՄԱԻՆ, ԱՅ ԵՍ ԲԱՂՏԱՍԱՐ ՇԻՆԵՑԻ ԶՏԱՊԱՆՍ ԶԱՅՍ ՀԱԻՐՆ ԻՄՈ ՇԱՊԱՆԻՆ: ՈՂՈՐՄԵՍՑԻ ՔԵԶ ԱԾ՝ ԶՀԱԻՐՆ ԵԻ ԹՈՂՈՒԹԻԻՆ ՇԵՈՐՀԵՍՑԻ [Յ]ԱՆՑԱՆԱՑ ՔՈՅ ԵԻ ՀԱՆԳՈՒՍՑԻ Ի ՀԱՆԳԻՐՁԵԱՆ. ԹՎ... ԻՄՈՅ ՊԱՂՏԱՍԱՐԻՆ ՑԻՇ[ԵՑԻՔ] Ի ՔՍ....⁴: Շիրմաքարի հյուսիսային կողմին քանդակված են խորհրդանշական:

⁴ «Դիվան հայ վիմագրության», պ. II, Երևան, 1960, էջ 120.

պատկերներ: Ձախ կողմում, վահանաձև մի շրջանակի մեջ, արված են սուր ծայրերով դեպի կենտրոն ուղղված սեպանման զարգաձևեր, իսկ կենտրոնում կլորավուն ոճավորված զարդաքանդակ է: Սրանից աջ պատկերված է կենաց ձառ, որն, ասես, կրկնում է մանրանկարներում հանդիպող նույն ծառի մոտիվը: Մառը բարձրանում է երկթեք գծայնությամբ արված պատվանդանի վրա, աջ և ձախ տարածվող ճյուղերն ավարտվում են նույն երկու պտուղներով: Մառի վերին մասը վերջավորվում է նույն պատկերով, ստորին մասում, երկու կողմերից պատկերված են կտուցներով դեպի ծառաբունն ուղղված, ճյուղերին նստած թռչուններ: Քանդակն արված է հստակ և պարզ արտահայտված գծայնությամբ, կլորավուն ուռուցիկ գծերի շեշտադրումով և նույն պատկերների ծավալային արտահայտչականությամբ: Մառի վերին, աջ անկյունում տեղադրված է ևս մի զարդապատկեր: Սրանից աջ պատկերված են մեկը մյուսից փոքր-ինչ ներքև գտնվող երկու մարդկային ֆիգուրներ: Յաժինը ձեռքին բռնած ունի սափոր, աջ ոտքը ծավալած է դեպի ետ: Վերին քանդակում պատկերված է երկու ձեռքերին թասեր բռնած, ծալապատիկ նստած մի մարդ: Այս քանդակից աջ դարձյալ վահանաձև շրջանակն է, որով եզրափակվում է հյուսիսային կողմի քանդակների շարքը: Այս քանդակը ևս եզերված է հարթ մակերեսով, վրան հավերժական նշանի երկու պատկերներ ունեցող գոտիով: Շիրմաքարի արևելյան ճակատի վերին մասում, կլորավուն զարդի մեջ փորագրված է վեցաթև աստղի պատկեր. ցածում մարդկային մի ֆիգուր, որը ձեռքերը պարզել է դեպի վեր և բռնել կլորավուն, հատած նույն հիշեցնող զարդապատկերներ:

Որսի հետաքրքրական տեսարանով XVI դ. կոթող է պահպանվել Անգեղակոթի նույն գերեզմանատանը: Ամբողջ պատկերի հորինվածքային հենքը երկու հեծյալներն են, որոնք հետապնդում են խուռնըթաց փախչող քարայծերին: Երկու հեծյալներն էլ ձախ ձեռքով բռնել են բազե, աջ կողմի հեծյալի ձեռքին կա նաև գավ: Հեծյալների արանքում պատկերված են մեկը մյուսից վերև փախչող երկու քարայծեր: Ստորինի եղջյուրներին փաթաթվել է վիշապ: Այստեղ ևս քանդակագործն, ակներևաբար, կամեցել է վերարտադրել հայ մատենագրությունից մեզ հայտնի այն ավանդությունը, որի համաձայն եղջերուները և քարայծերը վիշապասպան են: Քանդակագործը հիանալի վերարտադրել է կենդանիների, մասնավորապես քարայծերի սլացիկ վազքը:

Տապանաքարի երեք տողից բաղկացած արձանագրությունը ազդարարում է հետևյալը. «ԵՍ ՄԱՏԱՂԷՍ ՎԵՐԸՍՏԻՆ ՆՈՐՈԳԵՅԻ ԶԽԱԶՍ ԵՒ ԶՏԱՊԱՆՍ ՊԱՊԻՆ ԻՄՈՅ ՊԱՂՏԱՍԱՐԻՆ. ՅԻՇԷՔ ԹՎ: ԶՀԵ: (1521 թ.)»: Կոթողը կերտել է Ակոբ կազմողը:

Ուշագրավ է Վարդենիսի շրջանի Մեծ Մազրա գյուղի XVI դ. կոթողը: Թեմատիկ առումով շիրմաքարի քանդակազարդ մակերեսը բաժանված է երկու մասի: Ձախ կողմում որսորդական թեման է, աջում՝ կերուխումի տեսարան: Որսորդության տեսարանն ավարտվում է հեծյալի և վիշապ օձի մենամարտի պատկերով: Վիշապը պատկերված է նժույգի ոտքերի տակ, գալարուն շարժումներով, գլուխը վեր բարձրացրած: Հեծյալը նրա երախն է մխրճել ձեռքում բռնած նիզակը: Քանդակի երկու հատվածները միմյանցից անջատ-

ված են մարդկային պատկերով: Աջակողմյան հատվածում պատկերված է ծալապատիկ նստած մի մարդ, առջևում ուտեստով լեցուն պնակ: Քանդակաշարը եզրափակվում է երաժշտի պատկերով: Երաժիշտը նույնպես նստած է և ձեռքին ունի սազ: Քանդակազարդ մակերեսի այս հատվածում պատկերված է նաև երկփող նվագարան:

Կենցաղային քանդակների մեջ մեծ տեղ են գրավում արհեստավորական տեսարանները, գդակ կարողի, պայտարի, դարբնի աշխատանքային գործիքները, ինչպես նաև կենցաղային առտնին գործածության իրերն ու առարկաները: Իր բովանդակությամբ չափազանց հետաքրքիր է Մարտունու շրջանի Զուլաքար գյուղի XVI դ. կոթողի քանդակը: Տապանաքարի վիմագիր հիշատակարանից տեղեկանում ենք, որ այստեղ պատկերված է մի գդակ կարող իր արհեստի բոլոր գործիքներով և որ այս գդակ կարող Գրիգորը ունեցել է քառասուն աշակերտ: Արձանագրությունում ասվում է. ԵՍ ԳՐ(Ի)ԳՈՐ/Ս :Խ: (40) աղակերտ ուս(ու)ցի: Ես էնումս, Մարտիրոս կ(ա)ն(գնե)ցի տապ(ա)ն(ս)⁶:

Ինչպես մյուս քանդակները, այստեղ ևս հարթաքանդակ ֆիգուրները մակերեսի վրա տեղադրված են հիմնականում մեկ տողով, շարքով: Ձախից առաջին պատկերը հեծյալն է, որի գլխի կողմերում պատկերված են հուշկապարիկներ: Հեծյալին հաջորդում է կանգնած մարդու այլ պատկեր: Այնուհետև գալիս են սազ նվագողը և մի մարդկային ֆիգուր, որոնք նստած են միևնույն ծալապատիկ դիրքով և իրենց կեցվածքով ու հանդերձանքով գրեթե կրկնում են միմյանց: Վերջինս, հավանաբար, գդակ կարող վարպետն է, որովհետև հենց այս պատկերի մոտ են փորագրված գդակ կարողի արհեստավորական գործիքները՝ մկրատը, քերիչը, գդակի կաղապարը և գդակ հարդարելու ծաղկաձև զարդերը: Սրանցից վերև պատկերված է գոմշակովի տեսարան:

Դարբնի զնդան, պայտեր են վերարտադրված խաչակապ (Ղուշշի) գյուղի կոթողի որս պատկերող հետաքրքիր հորինվածքում: Գեղաքանդակ շիրմաքարի հարավային կողմի ամբողջ մակերեսը պատած է մարդկանց և կենդանիների ֆիգուրներով, ինչպես նաև կենցաղային իրերի պատկերներով: Քանդակի հերոսը պատկերված է որսի պահին՝ ձիու վրա նստած: Հեծյալն ամբողջ մարմնով թեքված է առաջ և նիզակով կամենում է հարվածել իր առջևից ընթացող քարայծերին: Նրա մարմինը պատկերված է պրոֆիլ, իսկ աչ կողքից կախված է կապարճը: Նժույզը նույնպես պատկերված է վազքի մեջ, որի ոտքերի տակ, գլխի վայր կա ևս մի կենդանի: Ձիու առջևի ոտքերի տակ պատկերված է դարբնի զնդան, ձախում՝ պայտեր, իսկ աչ կողմում կանգնած է դարբինը մուրճը ձեռքին, ձախ ձեռքով պայտը բռնած: Քանդակի վերին մասում տեղադրված են երեք քարայծեր: Այստեղ քանդակագործի կատարողական վարպետությունը հասել է իր գագաթնակետին: Հիանալի են վերարտադրված որսի կենդանիների շարժումներն՝ իրենց խաղի պահին: Եղջերավոր այծը վազքով մոտենում է մյուս այծին, սա առջևի մի ոտքը բարձրացրել է և ասես աշխուժությամբ դիմավորում է մոտեցողին, որի մարմնի մեջ է մխրճվել որսորդի արձակած նետը: Հետևից վազքով մոտենում է ձագը: Ամբողջ քանդակը շրջանակավորված է հյուսվածքաձև զարդապատկերով: Կոթողի արևմտյան ճակատին կարդում ենք՝ Թ(Վ) ՌԷ (1558):

⁶ Նույն տեղում, պ. IV, Երևան, 1973, էջ 196.

Միջնադարյան Հայաստանում տարածված արհեստ էր գորգագործությունը։ Միջին դարերից մեզ են հասել, թեև սակավաթիվ, սակայն աչքի ընկնող նմուշներ։ XVI դ. կենցաղային քանդակներում պատկերվել է գորգագործի տորթը։ Այն հանդիպում է Մարտունու շրջանի Զուլաքար գյուղի կոթողի վրա։ Օրորոցաձև այդ շիրմաքարի մակերեսը զարդարված է մարդկային ֆիգուրների և կենցաղային իրերի պատկերներով։ Ձախ կողմում տեղադրված են հավերժության նշան, սափոր, ուտեստով լեցուն պնակ, ապա՝ ձեռքերը կրծքին խաչած, ծալապատիկ նստած մի մարդ, որին հաջորդում է միջին դարերում լայնորեն տարածված երկփող նվագարանը։ Ամբողջ պատկերի մեջ առավել մեծ հետաքրքրություն է ներկայացնում գորգագործի ուղղանկյունաձև տորթը, որի վրա դրված են թելերի երկու կծիկներ։ Սրանք ընդգծում են պատկերված առարկայի տորթ լինելը։ Ապա հաջորդում է շարքն ավարտող մարդկային պատկերը, որն աչ ձեռքին բռնել է, ակներևաբար, քարգահ (գորգագործի գործիքը)։

Միջնադարյան կոթողների վրա իրենց գեղարվեստական մարմնավորումն են ստացել հայ երաժշտության, երաժշտական գործիքների պատմության համար չափազանց կարևոր լարային, շնչական, հարվածային գործիքները և ևրաժիշտների պատկերաքանդակները (նկ. 4, 5, 6)։ Միջին դարերի երաժշտական գործիքների տեսակների մասին բազմաթիվ ապացույցներ կան գրչագիր մանրանկարներով զարդարված մատյանների էջերում⁷։


Հետաքրքիր է, որ նվագարանների քանդակները զարմանալի համահայնչուն են մանրանկարներում հանդիպող երաժշտական գործիքների պատկերներին։ Սրանցում պատկերված են երաժիշտներ, գուսաններ, որոնք զվարճացնում էին ժողովրդի ամենատարբեր խավերին՝ տոնախմբությունների, հարսանեկան խնջույքների և կեր ու խումի միջոցին։

Նվագածու գուսանների քանդակներ են վերարտադրված պատմական կոտեից գավառի (Արուսյանի շրջան) Առինջ գյուղի միջնադարյան գերեզմանատան XV դ. օրորոցաձև տապանաքարի վրա, որի հարավային քանդակազարդ կողմին պատկերված են մի շարք մարդկային ֆիգուրներ և կենցաղային տեսարան։ Հստ էության պատկերի ընդհանուր բովանդակությունը խնջույքի թեման է։ Ամբողջ հարթության վրա փորագրված են հինգ մարդկային պատկերներ և մի քանի կենցաղային իրեր։ Ձախից աչ տեղադրված են երկու սափորներ, ապա՝ գրեթե միևնույն դիրքով երկու մարդկային ֆիգուրներ, որոնցից առաջինը ձեռքը մեկնել է դեպի սափորը։ Հորինվածքը չխախտելու նպատակով քանդակագործն, այնուհետև, պատկերել է ուտեստով լեցուն երեք պնակներ։

Թեմատիկ առումով հետաքրքիր են վերջին երեք ֆիգուրները, որոնք երաժիշտներն են։ Առաջինը քանոնահար է, երկրորդը՝ փողահար (ակներևաբառ գուռնա նվագող), երրորդը՝ լարային գործիք նվագող։ Շիրմաքարի հյուսիսային կողմին փորագրված են կենդանական երեք պատկերներ։ Առաջինում տեղադրված է երկգլխանի ձիու քանդակը, մի գլուխը առջևից, մյուսը ներքևից։ Գլուխները թեքված են միմյանց ուղղությամբ, ստեղծելով համաչափ դասավորություն։ Պատկերման այս եղանակը ժողովրդական քանդակագործության


⁷ Ա. Գևորգյան, Արհեստներն ու կենցաղը հայկական մանրանկարներում, Երևան, 1973, աղ. 43—48։

մեջ ունի ավանդական խոր արմատներ, որոնք տանում են դեպի հնագույն անցյալը: Երկրորդ պատկերն իրենից ներկայացնում է ցուլի և առյուծի մենամարտը:




Նկ. 4. XV դ. տապանաքար, Գեղովիտ, Մարտունու շրջան

Երաժշտական գործիքների պատկերներով է զարդարված Մարտունու շրջանի Ներքին Գետաշեն գյուղի կոթողը: Տապանաքարի հարավային կողմն ամբողջապես ծածկված է տարբեր շափերի մարդկային, կենդանիների, ինչպես նաև նվագարանների, կենցաղային բազմատեսակ իրերի պատկերներով: Քանդակազարդ մակերեսի վերին մասը պատկերում է քամանչա՝ իր աղեղով, ապա եղջերու և քարայծ: Վերին շրջանակի եզրային անկյուններում տեղադրված են ուղղանկյունաձև զարդապատկերներ, որոնք ամփոփված են կիսա-



Նկ. 5. XVI դ. տապանաքար, Գեղարքունիք, Կամոյի շրջան

շրջանի մեջ: Եղջևրուից ներքև մարդկային ֆիգուրներ են, իսկ սրանց կողքին սևդանաձև քանդակ: Մարդկանցից առաջինը ձեռքերը դրել է գոտկա-տեղին և վերարտադրում է պարային շարժում, երկրորդը նստած սազ է նվա-դում: Քարի ստորին մասի վրա տեղադրված է առավելապես մարդկային պատկերներով մի ուրիշ գոտի: Սրա առաջին քանդակը պատկերում է ձեռքի՝




Նկ. 6. XVI դ. տապանաքար, Գեղամիտ

սազ բռնած հեծյալ: Աջ կողմում ուղղանկյուն մի սեղան է, որի վրա դրված են գինու սափոր, հաց, ուտեստով լի պնակներ, այնուհետև պատկերված է ձեռ-քերը կողքերին դրած մարդ, որը հանդես է գալիս պարողի դերում: Ստորին գոտին եզրափակում է մի այլ հեծյալի քանդակ, որն ի տարբերություն ամ-բողջ քանդակի խրախճանքի տրամադրությամբ, ունի ռազմաշունչ բովանդա-կություն. հեծյալը ձեռքին բռնել է ոչ թե գավաթ կամ նվագարան, այլ կորա-շեղբ սուր: Գերեզմանաքարի այս կողմի շրջանակին փորագրված է ՍԲ ԽԱԶՄ ԲԱՐԵՆԱԽՍ(է) ՊԱՐՈՆ ՊԱՊԻՆ ՈՐԴԻ ՄԻՐՋԻՆ:

Հայ միջնադարյան ժողովրդական արվեստի ստեղծագործություններում արտահայտություն են գտել աշխարհական վայելքները, մասնավորապես կեր-ու խումի խոստման պատկերներն ու հարսանեկան կենաց ծառը (նկ. 7): Քանդա-կազարդող վարպետներն այստեղ աշխատել են հարազատ մնալ ավանդակա-նին: Առանձին դեպքերում մանրանկարչական ոճով կատարված կենաց ծառի՝ նունենու վերձիգ բնի երկու կողմերում դասավորված են մի քանի ճյուղեր, ո-րոնք վերջավորվում են նույն պատկերով: Հարսանեկան կերուխումի սեղա-նը հորիզոնական ձգվածությամբ հաճախ բռնում է հորինվածքի քանդակա-զարդ մակերեսի ամբողջ ստորին մասը: Մի հողվածի սահմաններում անհնար է վկայակոչել հարսանիք պատկերող բոլոր նշանակալից քանդակները. հիշա-տակենք միայն մեկը: Հրազդանի շրջանի Ներքին Քաղսի գյուղի տարածքում՝ գտնվող շիրմաքարի քանդակի սյուժեն բաղկացած է երկու մասից, առաջինը՝ առավել ընդարձակը, հարսանեկանն է, երկրորդը՝ որսի տեսարան: Հարավա-յին կողմի հարսանեկան տեսարան վերարտադրող քանդակում պատկերները

դասավորված են մեկ շարքով, դիմացից: Ամբողջ հորինվածքը ավարտվում է մեծածավալ սափորներով: Առանձնապես ճոխ է հարդարված հարսը: Նրա դուխը ծածկված չէ, սակայն երկու կողմերից իջնում են հյուսկեն ծամեր, որոնք, ասես, ողկուզվում են ոլորումների փովածքով: Հարսի պարանոցից կախված երկարավուն զարդերը ավարտվում են շղթայի օղակներ հիշեցնող



Նկ. 7. XVI դ. տապանաքար, Գեղովիտ

կլորավուն զարդերով: Նրա հագուստի երկու կողմից՝ վերից վար ձգվում են, թերևս գործվածքի ձևով արված, բանվածքներ: Կողքին պատկերված է կլորավուն գդակով և նույնպիսի ուղղահայաց գծեր (ակներեաբար ծալքեր) ունեցող տարազով փեսան: Նա երկու ձեռքով բռնել է մի պնակ, որի վրա պատկերված է հավերժության նշան: Այնուհետև գալիս են երկու երաժիշտները, որոնցից առաջինը քանոնահարն է, իսկ երկրորդը ողջ հասակով կանգնած սազը ձեռքին նվագածուն: Շիրմաքարի այս կողմի ստորին մասը շրջանակավորված է ծաղկաշղթա հիշեցնող զարդաքանդակով:

Հյուսիսային կողմի պատկերների դասավորությունը հիմնականում երկշարք է: Ձախ կողմում մեծ չափերով պատկերված է եղնիկ, նրա վերևում՝ մարդու գլխով, կենդանու մարմնով հուշկապարիկ, որից հետո փորագրված է ձախ ձեռքով ձիու սանձը բռնած մարդ: Քանդակի շրջանակի գեր կատարող հարթ մակերեսը զբաղեցված է երկտող արձանագրությամբ՝ ԵՍ ՂԱԶԱՐ ԿԱՆՔԵՅԻ ԽԱՔԱՐՍ ԱԶԻՆ ՈՒՋՊԷԿԻՆ ԼԱՐԳՈՒԼԻՆ ԵՄ ԶՈՒՋԻՍ ԿԱԶՄԻ ԽԱԶՔՄՑ:

Պատկերաքանդակներում չափազանց շատ են ինքնատիպ ոճով ու արտահայտչականությամբ աչքի ընկնող ցլամարտի, առյուծի և ցուլի մենամարտի խիզախ տեսարանները: Առյուծի և ցուլի մենամարտ պատկերող հետաքրքիր կոթողներից է Սիսիանի շրջանի Անգեղակոթ գյուղի մոտ գտնվող «Վարդան զորավար» անունով հնավայրի օրորոցաձև տապանաքարը, որի հարավային կողմին պատկերված են երկու մարդկային ֆիգուրներ, իսկ ձախ կող-

8 Ս. Բարխուդարյան, Միջնադարյան հայ ճարտարապետներ և քարգործ վարպետներ, Երևան, 1963, էջ 172:


մում՝ ձիւ Հյուսիսային կողին փորագրված է հայ միջնադարյան հուշարձանների հարդարանքում հաճախ հանդիպող առյուծի և ցուլի մենամարտի տեսարան: Ի տարբերութիւն նույնատիպ այլ քանդակների, ուր սովորաբար ընդգծվում է առյուծի զորեղութիւնը (Յախաց քար, Մակարավանք և այլն), այս քանդակում առյուծին նախապատվութիւն տալու որևէ ակնարկ չկա: Երկու կենդանիներն էլ պատկերված են դիմացից, մենամարտը սկսելու պահին: Առյուծը ներկայացված է ցատկ կատարելիս, իսկ ցուլը եղջյուրներն ուղղել է դեպի գազանը, պատրաստվում է դիմագրավելու գազանի ահեղ ցատկը: Տապանաքարի վրա կա հետևյալ արձանագրութիւնը. ԱՅՍ Է ՀԱՆԳԻՍՏ ԶԱՆԻՔԻԿԻՆ. ԹՎ. ԶՂԹ: (1550)⁹:

Հետաքրքրական են շիրմաքարերի վրա փորագրված շղթայված առյուծների քանդակները: Այդպիսի պատկերաքանդակով է հարդարված Անգեղակոթի օրորոցաձև տապանաքարերից մեկը: Կոթողի հարավային կողի ձախ կողմի մեծ մասը զբաղեցնում է առյուծի, ապա մարդու քանդակը, որից հետո աշխատանքային գործիքները և կենցաղային իրերը, որոնք ըստ էութեան կազմում են քանդակի առանցքը: Աջ կողմում են գտնվում փախչող եղջերուն, խոյերը և սրանց հակառակ ուղղութեամբ դրված քարայծր: Քանդակագործը շարքն ավարտվում է աղեղով զինված որսորդի պատկերով, որը հետապնդում է փախչող կենդանիներին: Ձախ հատվածում առյուծի պոչը կամարաձև բերված է մեջքի վրա, իսկ վզին զցված շղթան, որը կախված է պարանոցի տակ, ավարտվում է հանգուցավորվող զարդաքանդակով: Առյուծի շղթայված լինելը ակներևաբար վկայում է չարը սանձելու, հաղթահարելու, չարի նկատմամբ հաղթանակ տանելու փաստը: Շիրմաքարի հյուսիսային կողին պատկերված է որսի տեսարան: Շիրմաքարի արձանագրութիւնից իմացվում է, որ այն կանգնեցվել է ԶԶԵ (1536) թվականին:

Պատկերաքանդակներում իր գեղարվեստական մարմնավորումն է գտել վիշապամարտի թեման (նկ. 8, 9): Վարդենիսի շրջանի Զառքենդ գյուղի միջնադարյան գերեզմանատանը օրորոցաձև տապանաքարի հարավային կողին պատկերված է կիսաառասպելական որսորդական տեսարան: Հիմնական թեման կոխվել է օձ-վիշապների հետ: Ձախակողմյան մասը զբաղեցնում է հեծյալի ֆիգուրը, որը նիզակը մխրձել է օձ-վիշապի երախի մեջ: Օձը գալարաձև ընկել է ձիու սմբակների տակ և գլուխը վեր է բարձրացրել խայթելու համար: Ձիու առջև պատկերված է ինչ-որ մի այլ կենդանի: Ձիու սմբակների տակ տրորվող երախի մեջ մխրձված նիզակով վիշապի այս հանրահայտ սյուժեն XV—XVI դդ. ստացել էր հասարակական այլ հնչեղութիւն, այն իմաստավորում է ընդվզումը չարի դեմ, հայրենի երկիրը ներխուժածի դեմ: Մի փոքր վերև, դեպի աջ պատկերված է ձեռքին զինու սափոր և գավաթ բռնած մարդկային կերպար, որն, ասես, հաղթանակը ողջունողի խորհրդանշան է: Գավաթը զարդարված է հավերժական նշանի պատկերով: Այնուհետև ներկայացված է եղջերու՝ սլացիկ վազքի պահին: Քանդակը եզրափակող մասը նույնպես ունի ինքնուրույն հորինվածքային լուծում, որտեղ ավելի հստակ է երևում նրա հիմնական հեքիաթային թեման: Այստեղ երկու խճճված օձերի մարմիններ են. կծիկի միջից ցցված են վիշապների գլուխները, որոնք կուլ են տվել գառանը և այծին: Վերին մասում, որտեղ պատկերված է գառը, օձի բերանի մեջ

⁹ «Դիվան հայ վիմագրութեան», հ. 2, էջ 124:

են նրա առջևի ոտքերը, իսկ ստորին մասում այժը կիսով չափ վիշապի երա-
խի մեջ է: Պատկերն արված է լարի նկատմամբ ցասում առաջացնելու միտու-
մով: Տեսարանում չի շրջանցված մարդու մասնակցությունը: Վերին աջ ան-



Նկ. 8. XVI դ. տապանաքար, Զառքենդ, Վարդենիսի շրջան



Նկ. 9. XVI դ. տապանաքար, Կեղովիտ

կյունում ծնկալոք դիրքով պատկերված է լարած աղեղով նետաձիգը: Քան-
դակազարդ կողի ամբողջ մակերեսը երիզում են օվալաձև զարդաքանդակնե-
րի հյուսվածքաձև դուրիները:

Խաչքարերի, գերեզմանական կոթողների վրա եզակի շեն ժողովրդական հանդեսներ ու մարզական տոնախմբություններ պատկերող թեմաները: Հայ քանդակագործության դարավոր ավանդույթներին հավատարիմ XV—XVI դդ. քանդակագործ վարպետների հարթաքանդակային բնույթի ստեղծագործություններում դժալի տեղ են գրավում խոյամարտի տեսարանները: Հիշատակենք դրանցից մի քանիսը: Սիսիանի շրջանի Տոլորս գյուղի գերեզմանատանը պահպանված շիրմաքարի հյուսիսային կողմին պատկերված են երկու խորաններ, որոնց մեջ տեղադրված է մեկական զարդարուն խաչ: Զարդաքանդակի աջ կողմում վերարտադրված է մի հեծյալ և մեկ հետիոտն, որը բռնել է նժույգի սանձից: Տապանաքարի աջակողմյան հատվածի վերին անկյունում քան-



Նկ. 10. XVI դ. տապանաքար, Կարճաղբյուր, Վարդենիսի շրջան

դակագործը զետեղել է դեմ առ դեմ կանգնած երկու կռվող խոյեր: Հետիոտնը աջ ձեռքում բռնել է գինու գավ: Այս քանդակում առավել հետաքրքրականը խոյամարտն է: Տապանաքարի վերին՝ ավարտվող մասի երկթեք լանջին գրված արձանագրությունից տեղեկանում ենք, որ այն կանգնեցվել է ՌԼԹ (1582) թ.:

Խոյամարտի տեսարանով է հարդարված Վարդենիսի շրջանի Զառքենդ գյուղի կոթողը. վերջինս քանդակազարդված է երկու կողմից: Քանդակապատ տարածությունը բաժանված է երկու շարքի: Վերևի շարքում պատկերված են երկու հեծյալներ, որոնք հարձակվում են մեջտեղում գտնվող եղջերուի վրա: Զախ կողմի հեծյալը գինված է տապարով, աջակողմյանը՝ կորաշեղք սրով: Ստորին շարքի քանդակներում վարպետը պատկերել է խոյամարտի տեսարան: Խոյերը պատկերված են դեմ առ դեմ կանգնած, գլուխները մի փոքր դեպի վեր, այն պահին, երբ դեռ նոր պետք է սկսեն կռիվը:

Միջնադարյան քարգործ վարպետների թողած կոթողների սյուժեներում արտահայտություն են գտել նաև կյանքի պատահարները (նկ. 10): Այդ առումով հետաքրքիր է Վարդենիսի շրջանի Կարճաղբյուր գյուղի խմբաքանդակը: Օրորոցաձև տապանաքարի հարավային կողմի ձախ հատվածն ամբողջությամբ դրադենցում է նժույգի պատկերը, ապա՝ մեկը մյուսից վերև տեղադրված երկու մարդկային պատկերներ: Սրանց հաջորդում են մկրատը ձեռքին մի փոքր

Ֆիգուր և երկու նվագաժողովներ: Պատկերաքանդակի բովանդակությունը հետևյալն է. հանգուցյալը մահացել է ձիու հարվածից:

XII—XVI դդ. կենցաղային բովանդակություն ունեցող քանդակներում հանդիպում են նաև գավաթների, սափորների պատկերներ: Այդ քանդակնե-



Նկ. 11. XVI դ. խաչքար, Ջուղա

րից ուշագրավ է Ջուխտակ վանքի XII դ. եկեղեցու արևմտյան պատին, ճակատոնից ներքև, պատուհանի պսակի ձախ եղրին, վերարտադրված սափորի քանդակը և աջ եզրի հավերժության նշանը: Կամարաձև պսակի վրա փորագրված է ճարտարապետի անունը. ՍԱՐԳԻՍ ՎԱՐԴՊԵՏ ՅԱՂԱԻԹ ՅԻՇԵՑԵՔ:

Աշխարհիկ տեսարաններով են զարդարված նաև Զուգայի հուշակավոր խաչքարերն ու խոյաձև տապանաքարերը (նկ. 11)։

Վկայակոչված կոթողների ամբողջ շարքը կրում է աշխարհիկ, կենցաղային բնույթ և հավաստում է ժողովրդի հասարակական մտածողության աշխարհականացումը, աշխարհիկ բովանդակություն ունեցող քանդակների պատմա-մշակութային անուրանալի արժեքն ու նշանակությունը։ Միջնադարյան հայ արվեստի ժողովրդական ուղղության ներկայացուցիչների՝ քարգործ-քանդակազարդող վարպետների ստեղծագործություններն աչքի են ընկնում ոչ միայն կատարողական վարպետությամբ, արտահայտչականությամբ, այլև թեմատիկ բազմազանությամբ։ Այդ թեմաները մինչև XV դ. հայտնի էին մեր քանդակագործությանը։ XV դ. և հետագա դարերում ստեղծվածներն, ի տարբերություն նախորդ շրջանի աշխարհիկ քանդակների, պատկերում են ոչ թե իշխող դասակարգի, ֆեոդալական վերնախավի, այլ աշխատավորության, բուն ժողովրդի զբաղմունքը, կենցաղը։ Կենցաղային բովանդակություն ունեցող, գրչագիր մանրանկարներին համահնչյուն այդ քանդակներն արտահայտելով երկրագործական, հովվական, որսորդական, արհեստավորական, հարսանեկան, կերուխումի և այլ տեսարաններ, աչքի են ընկնում իբրև իրականության շփի հավաստի, խոսուն, կենդանի ազգագրական նյութ, առարկայորեն գծված կենցաղի իրերով ու առօրյա հետաքրքրական դրվագներով։ Հաղարամյա ավանդույթներին հավատարիմ միջնադարյան քանդակագործ-կազմողների առավելապես պատմողական բովանդակություն ունեցող այդ աշխատանքները լրացնում են հայ ժողովրդի անցյալի զբաղմունքի, կենցաղի մասին մեր պատկերացումները։

Հայ ժողովրդի միջնադարյան կենցաղային քանդակները կարևոր նյութեր են ընձեռում քանդակագործության զարգացման ընթացքն ու օրինաչափությունները, առանձին դպրոցները և ամբողջական պատկերը ուրվագծելու համար։

СРЕДНЕВЕКОВЫЕ БЫТОВЫЕ РЕЛЬЕФЫ АРМЕНИИ (XV—XVI вв.)

Г. О. КАРАХАНЫЯ

Резюме

Бытовые рельефы обычно делались на различных мемориальных и архитектурных памятниках. Отличительной чертой этих рельефов является подробное воспроизведение происходящего действия, что представляет большую ценность в качестве исторического материала. Творчество ваятелей народного направления стало предметом специального изучения экспедиции Института археологии и этнографии АН Армянской ССР, которая во время полевых работ 1955—1975 гг. собрала богатый материал. На рельефах встречаем многочисленные сюжеты земледельческого, пастушеского, ремесленного, охотничьего, свадебного, спортивного характеров, а также народных празднеств и пиршеств.